

# Il FEM a Tavau – vegnì al limit

Retrospectiva dal landamann Tarzisius Caviezel

■ **(anr/gc) «I dettia adina daplis che siglian sin il char (Trittbrettfahrer) dal Forum», di il landamann (president communal) da Tavau Tarzisius Caviezel.** Cun quai manegia el organisaziun e firmas che n'hajan da far nagut cun il Forum economic mundial (FEM) a Tavau. Els prendian si en il vitg localitads. Il FEM haja ussa cuntanschì ses limit ed il Forum stoppia vegnir tendenzialmain pli pitschen.

Per quest onn haja i dà per il Forum tantas dumondas sco anc mai da pudair metter si in pavigliun en il center dal vitg. Insaquantas localitads hajan ins schizunt laschè vi pliras giadas. Quai saja in problem che saja da schliar.

In punct negativ sajan er ils blers camions-tracturs (Sattelschlepper) che staupian si la Promenada (Via principala). Mo era las ca. 500 limusinas privatas hajan occupà quest onn parcadis enaivids e chaschunà qua tras in caos tar il traffic. Quels èn charads enturn l'en-

tir temp cun la consequenza ch'il traffic è dà ensemen. Ma i na saja betg uschè simpel da schliar quels problems, autruisa avessian ins daditg fatg quai. Era las autoritads chantunalas na possian far nagut, siond che la lescha lubeschia prest tut als possessurs da l'areal. La vischnanca haja sulet la pussaivladad da far tschertas cundiziuns tar ereger e dismetter pavigliuns e pertutgant il traffic.

## Stà in success

Or da vista poliziala è il Forum da quest onn stà in success. Il dumber d'arrestaziuns e da tals vegnids tegnids si è stà en il rom normal, segund *Walter Schlegel*, cumandant da la polizia chantunala. La segirtad da tuts participants – e tranter quels 330 personas che ston vegnir protegidas tenor dretg – eria garantida da tut temp.

Las demonstraziuns na lubidas a Tavau sajan stadas chaschunadas tras l'aura, vias e plazs plain naiv e n'hajan da far na-

gut cun la preschientscha dal president american *Donald Trump*.

Ensemen cun la delegaziun dal FEM da la regenza grischuna – sut cuss. gov. *Christian Rathgeb* – vegnian ins a seser ensemen proximamain per far critica da manevra en vista al FEM da l'auter onn, ha *Tarzisius Caviezel* fatg a savair.

## Dapli custs

Finzialmain è il bler gia decidi. La confederaziun, il chantun, la vischnanca da Tavau ed ils organisaturs èn s'entelgids sin ina cunvegna per ils proxims trais onns. La summa vegn auzada dad otg sin nov milliuns francs. La clav da repartiziun restia dentant la medema. Tar plicusts – sco prognosticà per quest onn – vegnia la confederaziun a contribuir fin 2021 ulteriurs 900 000 francs. Tenor cuss. gov. *Jon Domenic Parolini* sa pajan quests custs. L'occurrenza valia ils milliuns. Da tut quai profiteschia er il turissem grischun fitg.



Tarzisius Caviezel, il landamann da Tavau, ha tratg ina bilantscha positiva dal FEM a Tavau, fa dentant er insaquantas resalvas.